

TRIBUNA POLITICA

Sanadad e turissem: Ina schanza per las regiuns

DA CHRISTIAN RATHGEB,
PRESIDENT DA LA REGENZA*

Il 21 da settember 2016 ha lieu a Puntraschigna per la segunda giada la conferenza «Sanadad e turissem» cun participantas e participants dals secturs medischna, hotellaria, turissem e politica. Sut il titel «Schanzas sin il martgà e sfida: turissem da sanadad en il Grischun ed en il territori alpin» vegnan preschentadas e discutadas ideas, champs d'activitad e models da fatschenta che pertutgan il tema «turissem da sanadad». Il grond interess mussa: Il turissem da sanadad vegn considerà per il Grischun ed uschia er per il territori alpin sco grond potenzial da l'avegnir. En ses rapport davart il svilup economic en il Grischun, che la regenza ha sutmess il fanadur 2014 al cussegl grond ha ella lura er attribuì ina impurtanza creschenta al sectur «sanadad e bainesser». En la tractativa dal rapport il december 2014 ha er il cussegl grond accentuà l'impurtanza dal turissem da sanadad per il chantun Grischun. En ses program per ils onns 2017–2020 ha la regenza correspondentamain declarà il turissem da sanadad sco punct central da sia activitad per ils proxims quatter onns.

La regenza vegn a nominar proximamain ina



gruppa da lavur che survegn l'incumbensa da sviluppar ils concepts e las strategias per promover prestaziuns da sanadad orientadas a l'export. La gruppa da lavur duai definir las gruppas che vegnan en dumonda per purschidas dal turissem da sanadad, identifitgar ils basegns da questas gruppas e skizzar – per mauns da quests adressats sco er d'investiders potenzials – las purschidas specificas per questas gruppas tenor il potenzial da prestaziun dals ospitals e da las clinics sco er da l'hotellaria dal Grischun.

Purschidas en il sectur dal turissem da sanadad na gidan betg mo a diversifitgar la purschida turistica, mabain contribueschan er ad in provediment economic da la sanadad e sustegnan uschia la garanzia dal provediment medicinal da basa en il chantun. Impurtant per l'economia publica è er che plazzas da

lavor existentas vegnan mantegnidas e che plazzas novas pon vegnir stgaffidas tras purschidas en il sectur da sanadad. In studi dal Forum economic dal Grischun quinta cun in potenzial da 400 fin 750 novas plazzas da lavur tras il turissem da sanadad.

Jau sun persuadi fermamain ch'il turissem da sanadad è ina gronda schanza per mintga singula regiun da sanadad en noss chantun, uschia er per la Surselva. Las differentas purschidas turisticas che stattan a disposiziun en Surselva la stad e l'enviern èn enconuschantas lunsch enturn, in'hotellaria multifara è avant maun, ed en il sectur da sanadad procura la corporaziun da vischnancas SanaSurselva cun l'Ospital regional Glion per in ferm provediment da basa regional. Quai èn premissas optimalas per sviluppar purschidas dal turissem da sanadad.

Cun satisfacziun poss jau constatar che differentas purschidas dal turissem da sanadad existan gia en il chantun u èn en planisaziun. Jau ma legrel d'ulteriuras ideas e projects or da las regiuns, er or da la Surselva.

* Christian Rathgeb è schef dal departament da giustia, segirezza e sanadad